

湘

軍

記

湘軍記卷十九

東湖王定安撰

戡定西域篇

踰嘉峪關西行千五百里曰哈密爲古伊州回部親王食其地其北百二十里有天山天山者祁連也旁有蒲類海鄰蒙古喀爾喀部天山以北自巴里坤西北行千三百里而強曰烏魯木齊爲古車師後庭今都統提督分治之屬城十有六其西千三百里曰伊犁爲古烏孫國今將軍參贊大臣治之屬城九其地沙磧沃土相閒皆漢書所謂北

道也。乾隆間分設道府州縣治之。自哈密迤西而北。避白龍堆。行七百里至吐魯番。爲車師前庭。其東柳中。漢戍己校尉居之。由此以達天山南道。其名城八。自吐魯番西南行千里而強曰喀喇沙爾。爲古焉耆國。又西南行三百四十里至車爾楚台。卽漢烏壘爲漢都護所治。又西三百六十里爲漢輪台。又西南三百二十里。凡千里而強曰庫車。爲古龜茲國。唐安西都護治焉。自庫車西行千里而紉曰阿克蘇。爲古溫宿國。又西北行二百四十里曰烏什。爲古尉頭國。此所謂東四城也。自阿克蘇西南行千四百里而強曰

葉爾羌爲古莎車國。又迤西而北三百六十里曰英吉沙
爾。爲古伊耐國。又北二百里而強曰喀什噶爾。爲古疏勒
國。皆漢唐建庭之所。白葉爾羌南行八百里而強曰和闐。
爲古于闐國。此所謂西四城也。其俗皆城郭土著耕織商
賈。依堡而居。堡以百數。皆漢書所謂南道。今則回疆也。乾
隆中設參贊大臣駐喀什噶爾。總制南路。他城設辦事領
隊大臣分治之。其各回堡則以伯克理其事。自三品至六
品皆隨年班入覲。不得專生殺。自伊犁訖和闐南北三千
餘里東西七千餘里。號新疆。總制於伊犁將軍。凡漢時西

域三十餘國皆隸焉。道光中，張格爾平西陲，無事者三十餘年。至同治初元，陝回倡亂，遣其黨四出招誘，而後新疆回亂大起。先是，陝回阿渾安明，一名安得璘，假星命遊蕩金積

河隍間，比寇興，竊三婦人出關，至烏魯木齊，客參將索煥章家。索煥章者，前甘肅提督索文子也，素蓄異志，師事安明。安明掌教演經，妄言禍福，愚回多惑之。同治三年春，烏魯木齊都統藉防餉，勒州縣畝捐，緩來知縣毛遂、吾奇臺知縣恆頭皆不應，獨迪化知州孔福允之。都統乃自遣員搜括州役馬全、馱戶馬八，皆回民，無賴倚勢苛斂，敲比無

虛日漢民怨憤陰約木壘漢民結團練以抗捐而禦回馬
全亦結回民備之四月漢民與馬全戰奇臺市回敗遁入
南山匿不出會庫車回叛提督聶布冲遣兵赴南路討之
標兵故多回人行至喀喇沙爾潰歸六月遂舉烏城反索
煥章手刃提督戕其家屬據漢城推妥明爲主索煥章自
爲僞元帥書吏馬升爲先鋒進圍滿城八月陷之知州孔
福縉城跳都統平某盛服往議和死亂兵索煥章脅鎮迪
道尹某至其家將囚之其母罵曰爾父官一品爾官三品
今乃作賊縛職官罪當族吾不忍見也乃舍之尹某仰藥

死其家四十餘口殉焉。其時奇臺捕役馬福等率同眾陷奇臺。分掠綏來。昌吉。阜康。吉木薩。古城。皆陷之。而哈密。吐魯番。呼圖壁。庫爾喀。喇烏蘇。先後失守。於是妥明益自尊。僭號清真王。降索煥章爲散目。令守吐魯番。以其母屢誡煥章反正也。馬升。馬泰。馬仲。馬明。馬官。皆爲僞元帥。結纏頭。共取南八城。比城拔。纏頭竟自踞之。當是時。俄羅斯破滅。浩罕其國都。塔什干已爲俄據。安集延者。浩罕八城之一。古大宛地也。與喀什噶爾鄰。其酋帕夏曰阿古柏。收餘眾。自稱和碩伯克。保安集延而王。值布魯特。酋思的克等。

肇亂喀什噶爾奸回金相印迎帕夏出山圍喀什噶爾破之遂次第攻奪南八城安撫漢回商賈纏頭以其同類頗歸附安夷亦禁劫殺要結之四年安明遣黨分陷山北諸城五年纏頭攻伊犁九城陷之塔爾巴哈台亦不守

詔烏魯木齊提督成祿自肅州赴奇台會李雲麟辦新疆軍務雲麟自罷陝軍

上惜其才以侍衛充布倫托海辦事大臣崎嶇赴漢遙權伊犁將軍築城布倫托海旋爲賊襲陷論罪譴戍其後左宗棠奏調赴營薦保副都統所著西陲論略譏切時事其

言頗有可採云。八年，索煥章詭詞乞撫哈密，幫辦大臣景廉弗納。自烏城之亂，北路邊氓結團自保，寇至則戰，寇去則耕。其田公種公收，立壯士爲之長，兵事田事皆屬焉。於是徐學功起迪化，趙興體起綏來，劉鄉約起河西，馬進福、鄧生玉起古城奇台。又有張和、張興率團數千，日與回戰。先後歿於陣，而徐學功勇略冠一時。中外回皆畏之。徐學功者，少貧賤，喜技擊，鄉里號無敵。年弱冠，值寇作，乃結健兒數十，掠回莊貨，自贍。遇漢民，則保護之。雖邊外悍回，固已憚之矣。其後依附者日眾，有民兵五千人，每戰以馬。

隊陷陣。驟若風雨。賊鎗礮不得施。見之輒走。安酋帕夏聞其名。使使約和。九年。安明遣馬泰與安集延戰。庫車敗績。安酋潛勾馬仲。自吐魯番共攻安明。安明乞降。帕夏仍令爲清真王。踞守烏垣。以馬仲爲阿奇木總回務。其後徐學功陣斬馬仲。其子馬人得襲阿奇木僞職。與安明積不相能。復糾安夷來攻。於是帕夏約徐學功圍吐魯番。安明遣黨三次赴援。皆卻之。閏八月。遂拔吐魯番。帕夏揀精壯者縛送南八城。與徐學功進攻烏魯木齊。距城四十里。安明傾巢出戰。徐學功馬隊馳擊。安夷助之。回大奔斃其僞元。

帥馬官安明不敢還烏垣走綏來數日病死昌吉綏來呼圖壁皆下帕夏踞烏垣徵地稅權商貨令漢回雍髮易服效其國俗光頂圓領儼然異域矣初帕夏聞徐學功善戰故與友善冀其柄用薦已爲哈密王以南八城歸獻

朝廷已而知其驍猛無遠識且百戰不得一階益輕之令學功還南山仍以甘回馬人得爲阿奇木綰烏垣回務學功大恚常使馬隊閒出邀安夷商貨安夷患之與回纏合縱拒學功乘中秋襲其營學功僅率二百騎拒戰退走綏來南山帕夏乃縱安夷大掠以夷目守烏垣土回纏頭不

堪其援還降學功學功率大隊至烏垣與安夷鏖戰數月殺傷相當以糧罄還南山土回纏頭見學功去仍投安夷十年五月俄羅斯代收伊犁初康熙中俄夷與我畫界中國常住卡倫外有哈薩克布魯特烏梁海諸部游牧均羈屬於我其外復有甌脫地遠或千里近數百里兩無所屬所謂閑田也咸豐十年俄夷重修條約始以常住卡倫爲界中國方有事東南以其地絕荒遠未暇較而甌脫地延袤五千里及哈布諸部悉爲所侵伊犁塔爾巴哈台遂與俄夷偪處自回纏陷伊犁黨眾時相爭殺索煥章初遣數

千人往襲敗還至是俄夷以兵六百入據伊犁且聲言進收烏魯木齊其酋銅線自悉畢爾聞於京

詔署伊犁將軍榮全赴伊犁收回城池直隸提督劉銘傳道肅州出關規復新疆各城景廉成祿規復烏魯木齊左宗棠穆圖善撥兵顧關外宗棠方擊回河州奏言俄羅斯與我素無釁端其取伊犁名爲收復詞近順而心則狡關外回部向本愚弱不似內地諸回之狡悍而富庶過之所云收復伊犁揆諸弱肉強食之常乘閒抵隙之事亦母足怪惟尙欲收復烏垣則舐糠及米漸近中邊於理不協於

勢尤不可臣現規河湟未能興師遠舉然當此強鄰覬覦未敢拘執已咨商劉銘傳酌定進兵道路飛飭徐占彪馳赴肅州以便成祿拔隊出關會劉銘傳乞病還皖以曹克忠接統其軍未幾克忠亦乞病以臬司劉盛藻統之仍屯乾州成祿亦未果行其時肅州回出掠安西玉門敦煌窺犯新疆哈密大臣文麟烏魯木齊都統景廉以聞

詔催徐占彪迅赴肅州換成祿出關是年冬俄夷糾土回纏頭將襲烏垣陽稱赴綏來易市驅駝馬羊隻數千載洋貨銀鈔以行至石河距綏來八十里徐學功率馬隊截之

誅俄夷回纏數十人。餘悉縱還。盡奪其駝馬羊隻洋貨。並
俄鈔二萬兩。自此俄夷不敢東窺。以徐學功爲之障也。十
一年春。景廉率師抵古城。使使招學功至。綏來之沙山。集
舊部三千餘人。開屯田。且戰且耕。時文麟亦招團首孔才
自哈密赴古城。修堡興屯。孔才復收學功散勇二千餘人。
任耕戰。於是古田吉木薩屯田大興。兵食稍裕。其後徐學
功孔才皆擢提鎮。然事事承將帥風指。英氣漸減。異於初
起血戰時矣。十二年三月。陝回白彥虎援肅州。敗走出關。
四月。竄安敦玉。金順遣軍躡擊。副都統明春辦事大臣文

麟亦遣馬隊追之。白彥虎遁入山。六月。掠阿畢米特。署烏里雅蘇台將軍常順奏。催金順出關。秋。白彥虎率悍回數千分掠烏垣。綏來。徐學功橫出截之。殺數百人。奪駱駝五百匹。貨物無算。白彥虎自揣勢孤。益結安集延。自固。帕夏有所誅求。悉索以供。於是安夷日富。土回日貧。九月。左宗棠克肅州。陝甘平。

詔曰。現在關內肅清。急應乘此聲威。掃除關外各匪。金順迅赴古城。會景廉規復烏魯木齊。穆圖善久駐涇州。置兵無用。卽赴安敦玉。以壯聲援。哈密尙未解圍。張曜。宋慶久

歷戎行。辦事奮勇。卽馳往哈密。會文麟明春勦賊。各軍糧餉。左宗棠源源接濟。勿任缺乏。蓋

朝廷稔知宗棠積勞。但責餉事。未忍令其馳驅沙漠也。十三年。宗棠汰陝甘防軍。改營爲旂。以節餉。時日本犯澎湖。李鴻章調銘軍之在陝者赴山東。將渡海援臺灣。宗棠慮邠乾空虛。咨穆圖善撥涇軍五營接乾防。秋。張曜出屯哈密。大興水利。墾荒地二萬畝。歲獲數千石。以濟軍。哈密土質善滲。其耕墾用土工石工及毛氊包裹工。爲他處所無。張曜躬率所部經營締構。功亦勤矣。是時關外諸軍皆隸

烏魯木齊都統景廉金順出屯巴里坤頗與景廉不洽有旨垂詢宗棠奏景廉方正有學迴翔臺閣足式羣僚而泥古太過金順寬和服善爲眾情所附平時粥粥無能臨陣奮勉臣所目擊旣居前敵似宜以戰事責之

光緒元年三月

詔景廉補正白旗漢軍都統與侍郎袁保恆同京供職左宗棠以欽差大臣督辦新疆軍務金順爲烏魯木齊都統副之陝西巡撫譚鍾麟督西征餉事布政使裕寬陝安道沈應奎兼綰綰綽臺四月左宗棠奏起前署陝西巡撫劉典

赴蘭州

詔劉典以三品京堂候補幫辦陝甘軍務五月金順抵古城接統景廉軍汰三十餘營爲十九營合金順原部共四十餘營是時宗棠所部汰除四十餘營猶存馬步一百四十一營每歲需餉銀六百十四萬兩有奇金順歲餉銀二百六十四萬兩有奇穆圖善一百八萬兩雷正綰三十萬兩均由西征糧臺收放而駝乾屯費運費不在此數諸省關積欠銀二千六百萬有奇文牘咨催弗應也譚鍾麟奏言自五月陝藩司接管西征糧臺迄於八月僅收各省關

協餉銀八十餘萬兩。督臣左宗棠每月需的餉四十餘萬。近於新疆南北兩路創設採運數道。計程皆四五百里。運費月需銀二十餘萬。而舉辦屯田有費。購買車駝有費。製備軍火器械有費。整頓營伍裁撤勇丁有費。出款日增。入款愈少。數月來得以勉強支持者。恃借到洋款三百萬。然隨到隨放。現亦告罄矣。袁保恆前奏每屆年終一關。悉發滿餉。本年各營月餉固未滿發。轉瞬年關。需餉如命。若仍不發一月足餉。何以泯缺望之心。而作効忠之氣。今出關諸軍。整理待發。月餉之外。益以糧運窘乏情形。尤甚往年。

乞

飭部指提各省關欠餉六十萬爲年終一月滿餉並將出關糧運的餉一百四十餘萬兩限十月內外到陝轉運前敵以資支發西事幸甚

旨如所請時劉典因病辭幫辦

詔罷陝甘之行譚鍾麟復言宗棠出關後路防軍百數十營遠者距三千里倉卒有事無所稟承劉典與諸軍相習若令駐蘭州顧後路督臣得一意前敵迅赴戎機早蒞一日之功即可省一日之餉

詔促劉典白湘西行

二年正月左宗棠檄劉錦棠等軍自涼州赴肅州二月庚午劉典至蘭州宗棠以善後事畀之癸未禡旗啓行時朝議紛紜多以遠征勞費欲棄南八城封帕夏爲外藩英酋威妥瑪復爲之請宗棠奏言烏城之賊土回居多白彥虎復挈陝甘悍回分踞紅廟古牧瑪納斯與相聯而皆南與安西帕夏通自帕夏踞喀什噶爾各城吐魯番闢展以西土回皆附之帕夏能以詐力制其眾又從印度多購西洋鎗礮勢益猖獗土回纏頭皆倚之爲重然不敢顯與俄夷

較俄夷亦頗言其狡悍異諸賊。今官軍出塞自宜先勦北路烏垣等處。而後加兵南路。當北路進兵時。安集延或悉其醜類與白彥虎合勢死拒。當有數大惡戰。如天之福。事機順利。白逆殲除。安集延悍賊亦多就戮。由此而下兵南路。其勢較易。是致力於北而收功於南也。若賊情先圖自固。但作守局以老我師。則曠日持久亦在意中。外間議論或以爲事可緩圖。或以爲功可速就。或主撤兵節餉。或言難得易失。其命意皆因裨益洋務起見。豈真山衷之言哉。臣一介書生。高位顯爵。爲平生夢想所不到。豈思立功邊

域觀望

恩施況年已六十有五。日暮途長。乃不自忖量。妄引邊荒
艱鉅爲己任。雖至愚極陋。亦不出此。而事固有萬不容已
者。烏魯木齊各城不克。無總要之地。以安兵。今伊犁爲俄
人所踞。喀什噶爾爲安集延所踞。若此時置之不問。後患
環生。必有日蹙百里之勢。此區區愚忱。不敢不盡者也。其
後攻北路而南路遂平。竟如所策。三月乙巳。宗棠駐軍肅
州。肅州至哈密。中隔戈壁。水泉不能供千人。宗棠令諸軍
抵安西後。分起遞進。漢中鎮譚上連爲前鋒。甯夏鎮譚拔

萃繼之陝安鎮余虎恩又繼之均聽三品卿銜西甯道劉
錦棠節度四月劉錦棠出嘉峪關譚上連師次巴里坤譚
拔萃次哈密余虎恩越安西出戈壁西進烏垣回分掠塔
爾巴哈台却俄糧自布倫托海出紅柳峽金順遣軍蹕之
回繞古城走吐魯番還入烏垣

上以北路空虛飭左宗棠派兵兼顧宗棠乃檄領隊大臣
錫綸赴沙山護俄運桂錫楨馮以和各軍隸之金順復調
參將徐學功馬步四營助錫綸時譚上連進古城分兵屯
芟芟台色畢口大石頭三箇泉護運道金順自吉木薩飛

書乞糧宗棠撥巴里坤哈密存糧三百六十萬觔濟之宗
棠僱商駝萬隻負糧出哈密達古城比至肅州復以官民
車載糧道戈壁赴哈密而歸化包頭甯夏商駝負糧往巴
里坤者絡繹於道俄人復以糧市我輓輶轉輸遠者五千
里近亦三千里雖儲峙稍裕而費已不訾矣五月劉錦棠
令軍士取哈密存糧踰天山遞運巴里坤復由巴里坤遞
運古城閏五月錦棠次巴里坤進駐古城分兵屯木壘河
偵馬人得踞烏魯木齊白彥虎踞紅廟子土回馬明踞古
牧地法當先取古牧撒烏垣紅廟藩籬而阜康當賊衝距

古牧才百里。宜先據之。六月。錦棠輕騎赴吉木薩。與金順計事。約金順屯阜康城。自屯城東之九營街。圖進取。左宗棠增遣徐占彪。接防巴里坤。而張曜哈密之軍。分屯安西。宗棠令歸併哈密。以厚哈吐之防。白彥虎聞官軍大出。自紅廟移踞古牧。糾土回拒官軍。薙髮易服。竊附安集延。安夷亦遣纏回助戰。錦棠覘阜康城西野潦縱橫。延二十里。可疏廢渠供飲。自此行戈壁五十里。達黑溝驛。始有泉。戊申。令軍士開溝引水。傍廢渠而營。次日。赴戈壁。佯掘井。以懈賊。其夜。錦棠約金順潛襲黃田。破其卡。遙問古牧角。

聲四起。錦棠金順先踞山岡。余虎恩黃萬鵬等馬隊自山
馳下。與賊騎戰良久。步賊來助。譚拔萃譚上連董福祥等
步隊出中路。馬軍分左右抄之。賊大敗。守卡者皆跳官軍
還抵古牧。錦棠以城堅難驟下。還駐黃田。時古牧回酋馬
明爲帕夏逮赴南路。王治金中萬率土回堅守。王子錦棠
圍古牧。帕夏遣夷目阿托愛率騎賊來援。錦棠令余虎恩
馬隊列山前。嚴陣以待。遣步軍分攻山壘南關。皆下之。阿
托愛棄馬跳。丙辰。錦棠昇開花礮攻城。埃堞多圯。丁巳。克
古牧。守賊六千殲焉。錦棠度烏垣賊且他遁。戊午。自將趨

之抵城東安夷土回纏頭皆宵逸遂克烏魯木齊迪化州
及僞王城僞王城者安明所築也錦棠遣諸將分追三十
里至鹽池阻戈壁而返於是昌吉呼圖壁瑪納斯北城守
賊皆棄城遁帕夏所遣援賊五千騎已至達板距烏垣二
百里聞敗不敢進新疆北路略定惟瑪納斯南城未克捷
聞

賞劉錦棠騎都尉世職譚上連譚拔萃余虎恩等雲騎尉
世職諸將給獎有差七月宗棠以北路旣清咨金順錫綸
分扼各城堡要隘搜餘匪檄張曜徐占彪與劉錦棠進規

南路錦棠下令搜山。陶生林譚和義等趨東山。黃萬鵬譚上連譚拔萃余虎恩等趨大小二池。東南至柴窩。小有斬禽。當是時。帕夏踞托克遜。築三城自衛。托克遜者噶孫營也。北守板達。拒劉錦棠烏垣之軍。南守吐魯番。拒張曜哈密之軍。而烏垣敗黨。麇集板達。白彥虎于小虎踞南山。小東溝。遣黨四出刈禾。備乾糧。圖繞官軍後。戊辰。劉錦棠趨及之金口峽。老弱婦女數萬。踉蹌驚走。白彥虎于小虎已併入托克遜。錦棠還軍烏垣。帕夏以白于勢日蹙。待之甚

倨勒其眾薙髮易服。傍三城以居。宗棠檄張曜嵩武軍道奇克騰木爾圖展。徐占彪蜀軍搜巴古諸山。出木壘河與張曜夾攻吐魯番。木壘河地寬衍。容萬騎。亦饒水草。雍正中。岳鍾琪奏稱以重軍駐此。可保必效者也。時金順攻瑪納斯南城久不下。咨湘軍助剿。八月。劉錦棠派道員羅長佑與譚拔萃黃萬鵬董福祥等十一營赴之。宗棠以錦棠兵單。增遣總兵章洪勝方友升桂錫植等歸調遣。九月。復奏調金運昌軍五千人自包頭西行助錦棠。己丑。金順錫綸會湘軍克瑪納斯南城。掘偽清真王安明尸戮之。俘偽

元帥海玉馬受馬有才等並其悍黨殲焉。十月金順移駐
昌吉。令提督孔才駐瑪納斯。方春發駐呼圖壁。副將徐學
功等分屯北路要害。湘軍羅長佑等還烏垣。自後大雪封
山。諸軍不能踰嶺。而南帕夏與白彥虎乘暇移達板新城。
兩山間以大通哈守之。大通哈猶言大總管也。吐魯番故
有滿漢兩城。帕夏次子海古拉。又日役萬夫造僞王府。雄
闊異常。度是冬帕夏令白彥虎馬人得守吐魯番。海古拉
守托克遜。大通哈守達板。自居喀喇沙爾爲中權。策應之。
三年三月冰解。劉錦棠自烏垣踰嶺攻達板。張曜自哈密

西進先遣提督孫金彪與徐占彪會師鹽池趨吐魯番已
未劉錦棠抵柴窩留營守之柴窩距達板二十里夜初鼓
錦棠令軍士銜枚疾走期五鼓集達板城下大通哈新引
湖水衛城泥深及馬腹余虎恩陶生林夏辛酉等馬隊掠
過深淖列城左山岡譚上達譚和義戴宏勝等率步隊列
城後山阿降人崔偉等以馬隊承彌縫羣回方臥未覺也
天明霧收城回望見始大驚發西洋鎗礮下擊自卯至午
不絕我軍小傷亡屹立如故劉錦棠策馬周覽城濠坐騎
中鎗易馬而前飭各營築壘掘濠困之辛酉傍城東築礮

聖海古拉遣騎賊番進赴援。陶生林等截之隘口。分左右包抄。援騎皆返奔。城回盼。援不至。議突圍出走。錦棠誡諸軍嚴備。壬戌。侯名貴昇開花礮三。冥礮連環擊之。城身多坍。有頃。礮中火藥房。屋瓦輒石皆飛。大風驟起。引燒開花彈子。城中人馬碎裂。羣回奪門走。官軍遮之。不得出。錦棠使人呼曰。縛異裝者有賞。於是大小頭目悉致麾下。無一脫者。遂克達板城。禽其酋愛伊德爾呼里。卽安夷所號大通哈也。又獲胖色提六人。玉子巴什六人。胖色提者華言營官。玉子巴什者華言哨官。其餘夷職甚多。則華言管

理執事什長之類。於是大通哈暨諸胖色提同聲代帕夏乞款。願縛白彥虎獻南八城贖罪。錦棠聽其致書招帕夏。釋安集延南八城纏頭及土爾扈特種人數千。勿誅悉給衣糧。縱歸原部。夷回大懼。戊辰。錦棠進駐白楊河。聞嵩武軍孫金彪與徐占彪已下奇克騰木。進攻闢展及魯克沁。連木沁台勝金台。盡破其城壘。兩軍會於哈拉和卓。距湘軍僅兩日程。錦棠遣羅長佑率五營赴之。己巳。徐占彪孫金彪引軍至吐魯番。白彥虎先一日遁城東。守賊殊死鬪。乃麾馬軍兩旁抄襲。賊陣大亂。蹶至城邊。城回傾巢出戰。

戰正酣羅長佑領湘軍合力攻之賊西奔馬人得詣嵩武
軍降纏回萬餘跪地乞命孫金彪悉宥勿誅遂克吐魯番
滿漢兩城分駐之是日劉錦棠急馳百里抵托克遜海古
拉亦先遁守賊與官軍戰城外敗潰舉火焚糧藥棄城跳
錦棠遣軍士入城滅火纏回二萬餘人跪馬前降錦棠令
繳馬械候安插於是托克遜三城皆下自吐魯番告克南
八城門戶洞開帕夏日夜憂泣不知所爲白彥虎益掠人
畜焚村堡脅纏回同奔纏回皆怨而達板托克遜吐魯番
諸降眾官軍皆釋不問夷回無復疑懼轉相告語南入城

皆延頸盼官軍出水火。帕夏夙遇纏回虐，怨毒中人深。人思報復之。四月，帕夏在庫爾勒飲藥死。其子海古拉淹屍水中。三日始出，裹香牛皮，舁之西行。將達庫車，伯克胡里使使截之半途，殺海古拉。安夷所呼小帕夏也。帕夏名阿古柏，自稱畢調勒特汗，有子六人，長咬哥，卽伯克胡里非所愛也。次卽海古拉，次引上胡里，次邁底胡里，其二子無名。海古拉旣誅，伯克胡里保南境，而王夷回推白彥虎守庫爾勒。彥虎自踞開都河西岸，覬入俄羅斯。是時侍郎郭嵩燾出使英吉利，英人威妥瑪爲安夷緩頰，事下左宗

棠宗棠奏言竊維立國有疆古今通義必合時與地通籌之乃能權其輕重而建置始得其宜伊古以來中國邊患西北恆劇於東南蓋東南以大海爲界形格勢禁尙易爲功西北則廣漠無垠專恃兵力爲強弱兵少固啟戎心兵多又耗國用以言防無天險可限戎馬之足以言戰無舟楫可省轉餽之用非若東南之險阻可憑集事較易也周秦至今惟漢唐爲得中策及其衰也舉邊要而捐之國勢遂益以不振我

朝定鼎燕都蒙部環衛北方百數十年無烽燧之警不特

前代所謂九邊皆成腹地。卽由科布多烏里雅蘇台以達張家口。亦皆分屯列戍。斥堠遙通。而後畿甸宴然。蓋

祖宗朝削平準部。兼定回部。開新疆立軍府之所貽也。是故重新疆者。所以保蒙古。保蒙古者。所以衛京師。若新疆不固。則蒙古不安。匪特陝甘山西各邊時虞侵軼。防不勝防。卽直北關山。亦將無宴眠之日。而現今之與昔。事勢攸殊。俄人拓境日廣。由西而東萬餘里。與我北境相連。僅中段有蒙部爲之遮闔。徙薪宜遠。曲突宜先。尤不可不豫爲綢繆也。方今北路已復。烏魯木齊全境。祇伊犁尙未收回。

南路已復吐魯番全境祇白彥虎率其餘黨偷息開都河喀什噶爾尙有叛弁逃軍終煩兵力此外各城則方去虎口而投慈母之懷自無抗拒顏行者新秋採運足供餘糧栖畝鼓行而西宣布

朝廷威德且勦且撫無難挈舊有之疆宇還隸職方此外如安集延布魯特諸部則等諸邱索之外聽其翔泳可矣英人爲安集延說者慮俄之蠶食其地於英有所不利俄方爭土耳其與英相持我收復舊疆兵以義動彼將何以難之設有意外爭辯枝節橫生在我仗義執言亦決無所

撓屈新疆南路以吐魯番爲腴區其八城以喀喇沙爾所屬地多磽瘠餘雖廣衍不及北路而饒沃或過之全境收復經畫得人軍食可就地採運餉需可就近取資不致如前此之拮据憂煩張皇靡措也區區愚忱實因地不可棄兵不可停而餉事匱絕計非速復腴區無從著手局勢所迫未敢玩愒相將至省費節勞爲新疆畫久安長治之策則設行省改郡縣事有不容已者又言自浩罕爲俄人所併安集延諂附英吉利英人亦陰庇之茲復以護持安集延爲辭保護立國爲義其隱則恐安集延爲俄人所有夫

安集延非無立足之處。何待英人別爲立國。卽欲別爲立國。則割英地與之。或卽割印度與之可也。何乃索我腴地。以市恩。且喀什噶爾爲古疏勒國。漢代已隸中國。固我舊土也。而英人直以爲帕夏固有之地。其意何居。從前恃其船礮橫行海上。猶謂祇索埠頭。不取土地。今則並索及疆土矣。彼陰圖爲印度增一屏障。公然強我於回疆。撤一屏障。此何可許。我愈示弱。彼愈逞強。勢將伊於胡底。臣奉職邊方。惟有勉竭駑鈍。不顧目前成敗。利鈍圖之。郭嵩燾片奏乘阿古柏冥殛之時。席捲掃盪一語。尙無不合。現在南

路之師。劉錦棠三十二營。擬於八月中旬分起西進。張曜擬於九月初旬繼發。前聞英人遣使赴安集延。臣已馳告劉錦棠張曜。屬其善爲看待。如論及回事。則以我奉令討侵佔疆宇之賊。以復我舊土。他非所聞。如欲議論別事。請向肅州大營。彼如來營。臣自有以折之。

上嘉其奏。如所議行。七月。劉錦棠遣湯仁和等自托克遜進兵。八月癸未朔。董福祥張俊等自阿哈布拉沿途置哨。壘張春發繼之。均至曲惠而營。士卒曳糧清泉。接程以俟大隊。癸卯。錦棠率大隊行五日。至曲惠。余虎恩出庫爾勒。

之背。錦棠自趨開都河。開都河源出天山之麓。匯而南趨。貫庫爾喀喇沙爾之中。下流注於博斯騰淖。古所謂洑澤者也。白彥虎壅開都河水。溢百餘里。以遏我軍。錦棠馬步繞淖行。艱地。紆折達開都河東。白彥虎先期走庫車。九月癸丑朔。錦棠收復喀喇沙爾。城中水數尺。廬舍蕩然。召其台吉。遷蒙民數百戶實之。乙卯。余虎恩收復庫爾喀。城空無人。食罄。掘窖糧數千石濟軍。錦棠偵白彥虎脅纏回走布告爾。急行四百里至洋薩爾。見各堡火光燭天。知回去未遠。令後隊救火。前鋒及之。布告爾黃萬鵬譚拔萃與

戰破走之。次日追四十里。以西洋測微鏡瞭回眾尙數萬。持鎗矛者才千人。錦棠令曰。執械者誅。餘勿問。亟逐之。賊委難民狂奔。錦棠悉遣歸復業。仍領精騎躡賊。甲子至托利賴。纏回萬餘伏地號呼。復慰遣之。乙丑五鼓蓐食。行數十里至庫車。白彥虎方驅纏回西走。纏回不從。皆散布郊原。見官軍至。倉卒列隊。錦棠麾馬步突之。皆大奔。遂復庫車。是役自庫爾勒六日馳九百里。拔難回約十萬。左宗棠遣員設善後局安撫之。籌籽種。招耕牧。治塗造船以通商賈。纏回附者益眾。白彥虎在拜城與安集延。胖色提等日。

夜掠城外纏回爲助。村堡皆墟。拜城回閉關拒之。丁卯。錦
棠軍至。遣通事諭之。拜城回目買賣提托呼達等開城迎
降。錦棠留方友升鎮撫。而自履冰夜行。戊辰。至銅廠。與回
還賊糾二萬眾列河岸拒戰。錦棠鼓之。騎賊皆靡。積尸塞
河水爲不流。遣難回悉還拜城。復促所部亂流而渡。擊回
於上銅廠。連敗之。遂越察爾齊克台而西。己巳。度戈壁百
四十里。至哈拉裕勒。庚午。至札木台。解鞍小憩。進薄阿克
蘇。遙望城上鎗矛林立。西南飛塵蔽天。遣候騎覘之。則前
一夕回目將獻款。爲胖色提縛去。其閉關設守者。城回十

萬餘人嚴備以待官軍者也。錦棠召回目出城諭以威德。羣回膜拜乞撫。遂復阿克蘇。駐軍漢城。遣將躡擊白彥虎於胡馬納克河。敗之。獲哈密回王邁合默特之母。送歸其部。貨遣難回還庫車。白彥虎見官軍日迫。患之。乃嗾安夷。竄葉爾羌。自竄烏什。翼分兵力以緩死。錦棠舍安夷勿追。專力討白逆。令黃萬鵬張俊趨烏什。譚盛典夏辛酉自西會之。辛未渡胡馬納克河。行戈壁八十里。俘黨魁馬有才等。壬申擊回於烏什城東。敗之。遂復烏什。次日至阿他伯什。阻戈壁而返。於是南疆東四城皆下。

上念湘軍冒寒遠征。一月中馳驅三千餘里。劉錦棠開西甯道缺。晉秩三品京卿。諸將給獎有差。十月癸未朔。張曜由哈喇沙爾進庫車。庫車迤南曰沙雅爾。其酋麻木爾叛。附安集延。聞官軍已下東四城。遁匿哈番。哈番在阿克蘇西南四百里。錦棠率席大成等親攻之。辛卯。擊賊哈番西。麻木爾受創遁。部眾解散。錦棠還軍阿克蘇。當是時。帕夏長子伯克胡里踞喀什噶爾。猶保西三城。而和闐伯克呢牙斯圖反正。乘隙圍葉爾羌。遙爲官軍聲援。伯克胡里僅餘一城。憤甚。率五千騎與呢牙斯戰於葉爾羌。呢牙斯敗。

走降於我。伯克胡里進奪和闐，踞之。而喀什噶爾守備何步雲、章京英韶及滿漢兵弁陷賊中者，尙數百人，相率守漢城，使使迓官軍。安酋阿里達什保回城，以攻漢城。且約白彥虎來助。伯克胡里乃棄和闐，走英吉沙爾，併入回城。十一月，劉錦棠分三路進軍。黃萬鵬等由烏什道布魯特邊爲奇兵，桂錫楨等由阿克蘇道巴爾楚克爲正兵，均聽進止於余虎恩，以取喀什噶爾。錦棠白駐巴爾楚克瑪納爾巴什，扼葉爾羌和闐衝要。甲子日中，余虎恩師次喀城北。黃萬鵬次喀城東，相距六十里。賊候騎猝遇官軍，馳歸。

呼於城曰。大軍至矣。繼回皆駭潰。安酋禁殺不能止。伯克胡里白彥虎分路跳。留其黨守城。綴我軍。是夜三鼓。兩軍抵城下。城回縱火燒廬舍。以騎賊出拒戰。余虎恩進中路。蕭元亨等出其左。戴宏勝等出其右。比交綏。回大敗。俘僞元帥王元林。降弁何步雲。英韶等。憑漢城大呼。回城恟懼失措。開西門出走。遂克喀什噶爾。時天色猶未明也。乙丑。余虎恩留張俊守喀城。黃萬鵬出西北追白彥虎。余虎恩出正西追伯克胡里。俘于小虎馬元於陣。白彥虎伯克胡里及阿里達什遁入俄羅斯。時劉錦棠師次阿郎格爾。遇

安夷百餘騎殲之疾驅而前戊辰至葉爾羌城回先遁遂復葉爾羌錦棠入居新城辛未錦棠收復英吉沙爾庚辰董福祥收復和闐於是南疆西四城皆下俘故帕夏妻女及其子引上胡里邁底胡里並兩少子三孫按律治之于小虎馬元麻木里暨倡亂之金相印父子磔於市誅悍黨一千一百六十人新疆平

詔曰溯自同治三年布魯特叛亂逆回金相印陷喀什噶爾蠶食南八城而吐魯番烏魯木齊等城相繼淪陷於今十有餘年朝廷翼行天罰特命左宗棠爲欽差大臣督辦

新疆軍務。該大臣勦撫兼籌。議定先規北路。首復烏魯木齊。以扼其總要。旋克瑪納斯。數道並進。規復吐魯番等城。力爭南路要隘。然後整旅西行。勢如破竹。現在南八城一律收復。該領兵大臣櫛風沐雨。艱苦備嘗。允宜特沛殊恩。用酬勞勩。左宗棠籌兵籌餉。備歷艱辛。卒能謀出萬全。膚公迅奏。著由一等伯晉爲二等侯。三品京堂劉錦棠。智勇深沉。出奇制勝。用能功宣絕域。著由騎都尉世職晉爲二等男。其餘諸將給獎有差。是時湘軍聲威遠懾。諸番夷僑寓南八城者。皆翕然聽命。凡獲英吉利商官一人。隨從商

賈九人乳目洋操教習二人商三人阿刺伯三人溫都斯
坦三十餘人鄂勒推帕二十餘人克什米爾一千七百餘
人巴達克山三千餘人巴爾替一千餘人科拉普一百五
十餘人哈普隆二百五十餘人劉錦棠以諸種人自稱商
賈殺之不武悉宥勿誅其英人乳目人給文返國布魯特
十四部落願隸中國者納之

四年十月安酋阿里達什自俄境入寇糾纏回出奈曼謀
襲喀什噶爾劉錦棠親擊於玉都巴什大破之奈曼回目
庫彌什設伏誅阿里達什以獻並其餘黨悉殲之左宗棠

以俄人庇匿通寇慮諸將忿極啟覈請

飭總理衙門與俄人議之時侍郎崇厚出使俄羅斯議交還伊犁事有

旨垂詢宗棠宗棠奏言俄人自佔據伊犁於西面舊有拱宸瞻德廣仁塔勒奇四城均棄而弗守傾圯殆盡綏定一城近以之雜置陝回距伊犁僅三十里伊犁大城人煙甚少俄兵及商戶均萃居東南惠甯熙春甯遠三城而金頂寺烟戶尤多伊犁管事俄官名馬依爾品秩不過中國同知通判之類主伊犁之事者七河巡撫也所駐阿圖瑪爾

地屬俄境在伊犁西八百餘里其兼轄之官爲圖爾齊斯
坦總督自稱代國大臣駐浩罕故都塔什干城距我喀什
噶爾不過十數程自喀什噶爾至俄邊納林河中隔俄屬
布魯特部喀城馬行六日可至從前伊犁本不與俄境相
連近年俄人先後脅誘哈薩克布魯特種人又攻奪浩罕
三部據其都城而浩罕屬安集延亦隨風而靡故我北路
伊犁南路喀什噶爾之邊境皆與俄屬相連距俄亦近也
臣前疏所謂地不可棄者竊以腴地不可捐以資寇糧要
地不可借以長敵勢非乘此兵威迅速圖之彼得志日驕

將愈近愈偏而我饋運艱阻勢將自絀無地堪立軍府所
憂不僅西北也伊犁收還以後應於邊境擇要築壘開濠
安設大小礮位挑勁兵以增其險其西北之塔勒奇廣仁
瞻德拱宸各城戶口鮮存水草卻便應暫駐各營分屯其
閒其東惠甯熙春甯遠各城民戶商戶願遷往者遷往願
歸業者歸業邊圉旣奠人安其土耕其野而出其途者不
待招徠矣現在北路戶口日增開墾日廣南八城地方富
庶劉錦棠張曜開溝築堡鑄錢徵釐開設行省機有可乘
失今不圖未免可惜

上可其奏。

五年正月，安集延布魯特寇邊，劉錦棠迎擊於烏帕爾，大破之，斬二千餘人，賊還遁俄羅斯。時崇厚與俄人定約，議以伊犁歸我，償兵費銀二百八十萬，而劃伊犁西界數百里予俄，又割南界數百里跨天山以隔南八城，其他侵佔口岸尤多。崇厚已赴黑海畫諾矣，電報至京，中外大譁，或疑崇厚既充全權大臣，渝盟且啟衅，或以新約妨民病國，宜誅崇厚以拒俄。

上亦怒崇厚輕率褫職逮問，而令疆臣策萬全。左宗棠奏

言中國削平髮捻。兵力漸強。制礮造船。已著成效。彼如思逞。亦有戒心。而淪約稱兵。各國先失商賈之利。必且知難而退。此時惟有先之以議論。委婉而用機。次之以戰陣。堅忍而求勝。臣雖衰庸無似。敢不勉旃。

上壯其言。嘉許之。宗棠乃自請出屯哈密。規復伊犁。

六年正月。

詔毅勇侯曾紀澤自英國赴俄議約。通政使劉錦棠幫辦新疆軍務。二月。左宗棠分兵進取伊犁。奏以精河一帶爲東路。伊犁將軍金順主之。所部馬步萬人。檄卓勝軍二千。

爲之助。自阿克蘇沿特克斯河爲中路。廣東提督張曜主之所部馬步五千人。增募皖勇千人。土爾扈特馬隊數百人。復檄湘軍二千五百爲之助。自烏什經布魯特游牧爲西路。幫辦軍務劉錦棠主之。所部馬步萬餘人。而分遣譚上連步兵二千餘人屯喀什噶爾。譚拔萃等二千餘人屯阿克蘇。陶鼎金王福田等二千餘人屯哈密。爲後路聲援。塔爾巴哈臺與俄偪處。參贊大臣錫綸兵不足。募徐學功孔才舊部二千畀之。四月乙卯。宗棠發肅州。舁輓以行。五月乙亥。抵哈密。俄人聞。

王師大出。增兵守伊犁。納林河。而以兵船翔海上。冀震撼京師。於是天津奉天山東皆警。七月。

詔左宗棠入京備顧問。劉錦棠署欽差大臣。張曜幫辦軍務。楊昌濬護陝甘總督。山西巡撫曾國荃督辦京東軍務。屯山海關。提督鮑超屯樂亭。直隸總督李鴻章整飭天津海防。八月。劉錦棠軍至哈密。十月。張曜移駐喀什噶爾。總西四城邊防。分嵩武軍屯英吉沙爾。移董福祥等屯和闐。葉爾羌。羅長佑等屯阿克蘇。瑪納爾巴什。譚上達屯葉和。西城。余虎恩屯烏什。譚和義屯吐魯番。譚拔萃屯庫車。哈。

喇沙爾左宗棠道甘陝山西赴京令知府王詩正率旌善馬隊親軍步隊行草地赴張家口備調遣

七年正月和議成海防諸軍皆罷二月左宗棠至京授軍機大臣曾國荃擢陝甘總督乞病還湘以譚鍾麟代之時曾紀澤與俄人更定約章已允協

詔金順接收伊犁按圖劃界參贊大臣升泰錫綸佐之八月劉錦棠真除欽差大臣屢疏懇辭

上慰勉之

八年三月譚鍾麟劉錦棠奏設新疆郡縣自哈密南至吐

魯番北至精河照鍾麟原奏無須另設多員其回疆東四城設兵備道一員駐阿克蘇阿克蘇爲古溫宿國設溫宿直隸州知州一員治阿克蘇拜城知縣一員隸之喀喇沙爾撫民同知一員庫車撫民同知一員烏什撫彝同知一員統轄於東四城巡道西四城設兵備道一員駐喀什噶爾喀什噶爾爲古疏勒國設疏勒直隸州知州一員治漢城疏附知縣一員治回城隸之英吉沙爾撫彝同知一員葉爾羌爲古莎車國設莎車直隸州知州一員治漢城葉城知縣一員治回城隸之瑪納巴什水利撫民通判一員

和闐爲古于闐國。設和闐直隸州知州一員。治和闐。于闐知縣一員。治喀拉噶什。隸之。統轄於西四城巡道。初左宗棠議設新疆總督一員。駐烏魯木齊。新疆巡撫一員。駐阿克蘇。譚鍾麟則謂設省應從州縣起。然後遞設督撫。轄之。至是劉錦棠奏言。臣自出關辦賊。歷今七載。熟度關外形勢。固舍設郡縣易舊制。別鮮良圖。惟將新疆另爲一省。則臣頗以爲不然。現在新設南路同通州縣。合之哈密及鎮迪道原有各廳州縣。不過二十餘處。卽將來地方富庶。增亦無多。嘗考各省州縣。最少者莫如貴州。廣西。新疆尙不

及半其難自成一省明矣。且新疆與甘肅形同唇齒。從前左宗棠以陝甘總督辦新疆軍務。凡兵餉製辦皆以關內爲根本。臣受代兩年。尙未偵事者。皆賴譚鍾麟楊昌濬力顧全局。故能勉強支持。向使甘省大吏稍分畛域。則邊事已不堪問。若將關內外劃爲兩省。以二十餘州縣孤懸絕域。其勢難以自存。惟新疆歸甘肅節制。鞭長莫及。擬仿江蘇建置大畧。添設甘肅巡撫一員。加兵部尙書銜。以烏魯木齊爲省治。哈密以西。南北兩路道廳州縣皆隸焉。新疆布政使一員。隨巡撫駐紮。鎮迪道加按察使銜。管刑名驛。

傳改迪化直隸州爲知府添設迪化知縣並昌吉綏來阜康奇台爲五縣俱隸迪化知府伊犁滿營照各省駐防將軍營制鎮迪道無須都統兼轄伊犁將軍亦無庸總統全疆移烏魯木齊提督駐喀什噶爾烏垣自設撫標南北兩路另設額兵添設總兵副將參遊都守千把等官吐魯番暨南路舊有參贊辦事領隊各大臣一律裁去自哈密北至伊犁都統辦事領隊各臣酌量裁撤疏入下吏部議行九年四月劉錦棠譚鍾麟始委員試署南疆道廬州縣設吏戶禮兵刑工六房以舊有伯克經收糧賦者充之令與

習漢字書吏雜處互授漢回文言另設義塾訓回童督兵
勇修補城垣造

壇廟倉敖監獄通驛傳設塘站南疆歲征糧至二十餘萬
石兵食充然有餘百廢具舉民氣漸蘇回疆積弊漸除殆
淨矣

十年十月

詔授劉錦棠爲甘肅新疆巡撫魏光燾新疆布政使

十一年三月劉錦棠進駐烏魯木齊省城奏移烏垣巴里
坤旗兵併入古城設城守尉治之增設布政司經歷一員

布庫大使一員鎮迪道庫大使兼按司獄一員迪化府經歷兼司獄一員改迪化州吏目爲縣典史迪化州學正爲府教授裁庫爾哈喇烏蘇糧員設撫民同知一員照磨兼司獄一員裁精河糧員設分防驛糧巡檢一員隸於同知其喀喇巴爾噶遜糧員以迪化知縣兼之又奏裁伊犁參贊大臣增副都統二員佐將軍同駐惠遠大城

十二年春劉錦棠奏修新疆省城拓迪化滿漢兩城而一之始建撫藩衙署四月奏增伊塔兵備道一員駐甯遠城升伊犁撫民同知爲伊犁知府治綏定城增設綏定知縣

一員以廣仁瞻德拱宸塔勒奇四城隸之甯遠知縣一員
治甯遠城以惠甯熙春兩城隸之俱隸於伊犁知府又設
伊犁分防通判一員兼理事銜精河撫民同知一員改塔
爾巴哈台理事通判爲撫民同知仍兼理事銜俱隸于伊
塔道其他首領雜職如內地於是新疆南北郡縣之制大
定至光緒十三年綜計漢回纏民及入籍安民二十六萬
六千九百五十九戶男女大小一百二十三萬八千五百
八十三丁口丈量荒熟地一千一百四十八萬一百九十
四畝有奇額徵本色糧二十七萬六千五十一石有奇本

色草一千四百九十萬二千七百斤有奇折色糧草及地
課銀五萬九千一百四十八兩有奇其已懇熟地現徵本
色糧二十萬三千石有奇本色草一千三百九十五萬八
千二百斤有奇折色糧草及地課銀五萬七千九百五十
二兩有奇

王定安曰史稱西域城郭諸國兵弱易擊匈奴烏孫常役
屬之徵其賦稅蓋古之屏弱小邦也然而恃其險遠遮殺
漢使拒王命者亦屢矣其後漢益出師斬樓蘭誅宛王毋
寡諸戎畏懼始稽首稱外臣乃設都護校尉鎮撫之匈奴

遂益衰弱。故漢之經營西域。其意在匈奴。非黠武勒遠之謂也。今俄夷與我毘鄰。東西互萬里。其患豈止漢匈奴比哉。而回疆柔懦反側。棄之且爲所噬。日蹙百里。不致於地盡不已也。左文襄排眾議而獨任其難。不惜竭天下全力圖之。其深謀遠慮。弭禍亂於已兆。豈非古之所謂社稷臣乎。劉公錦棠挈百戰之師。乘破竹之勢。霆摧電激。不數月廓清萬里。雖傅介子班超陳湯之立功絕域。何多讓焉。於戲盛矣。

湘軍記卷十九

東湖黃學淵校字

湘軍記卷二十

東湖王定安撰

水陸營制篇

國家養綠營兵五十餘萬。歲糜二千萬金。遇寇發征。調四出。率用本轄營弁統之。其部卒眾寡不齊。少或百人。多至千餘人。綰以提督鎮將。而皆隸於專征之欽差將軍都統督撫。其由提督膺欽差者。他提督均聽節度。本轄營弁或傷死退黜。則用他將兼領。將不必由帥選。一營士卒視調發多少無定額。二百年來行之久矣。自洪楊倡亂。大吏久

不習兵緣營皆竄驕惰聞羽檄征調則舉室驚號以爲趨死地無生還理比至前敵秦越楚燕之士雜糅並進將與將不相習兵與兵不相知勝則相妒敗不相救欽差疆帥復時相齟齬號令歧出偏裨各分畛域徵兵日繁迄不得一兵之用於是諸路將帥頗厭征調勞費稍事招募湖勇川勇萌蘖漸起然其人多游民劇盜剽悍繹騷民尤患苦之江忠源初創楚軍劉長佑佐之挈其鄉人子弟慷慨赴敵始講節制禁騷擾義聲日起其時草昧締構實爲湘軍濫觴迨曾國藩以儒臣治軍長沙羅澤南王鑫皆起諸生

講學敦氣誼。乃選士人領山農。滑弁遊卒及市井無賴。擯斥不用。初立三百六十人爲一營。已而改五百人爲一營。營分四哨。哨官四人。統以營官。自兩營迄十營。數十營。視材之大小而設統領焉。統領逕隸大帥。故營哨官所轄有定數。統領所轄無定數。欽差督撫皆大帥也。帥欲立軍。揀統領一人。檄募若干營。統領自揀營官。營官揀哨官。以次而下。帥不爲制。故一營之中。指臂相聯。弁勇視營哨。營哨官視統領。統領視大帥。皆如子弟之事其父兄焉。或帥欲更易統領。則並其全軍撤之。而令新統領自揀營官如前。

制或卽其地募其人分別汰留遂成新軍不相沿襲也當
湘軍初起山農柔懦者亦頗畏遠征及援江西士人輕死
陷陣疊克縣城國藩聞而樂之益以忠義激勵將士而塔
齊布羅澤南李續賓李續宜劉騰鴻蕭啟江之倫皆崇紀
律重廉恥於是隴畝愚氓人人樂從軍聞招募則爭出効
命無復綠營征調離別可憐之色其後湘軍戰功徧天下
從戎者日益眾或募千人則萬人應之募萬人則數萬人
應之勢不能盡收甚至丐書干請而後得入其隨營待補
客死他鄉者不可勝數而湘人士迄無怨心所謂有勇知

方者耶。王鑫羅澤南初起才千人。江忠源援鄂。援江西。援皖。所部四千。國藩初議併澤南。鑫軍募足六千。合江軍成萬人。未行而國藩奉

命東征。水陸萬七千人。是時軍容號爲極盛。遂以平定兩湖。揚威江皖。其後胡林翼撫湖北。養兵至六萬。多隆阿鮑超各領萬人。戰皖鄂閒。曾國荃領萬人圍安慶。楚師於斯始。大安慶克。國荃進圍金陵。屢增兵至五萬。號百營。遂藏大功。其後曾國藩勦捻。統湘淮軍百六十營。比於初起時。何啻倍蓰。迨左宗棠劉錦棠平秦隴。率師出關。所部百數

十營雖號老湘營，閒用他省人，錯雜其閒。然其營制薪糧，猶遵循未改也。錄其制如左。

凡立營，營官一人，親兵六十人，親兵什長六人，營分四哨，前後左右哨官各一人，哨長四人，護勇二十人，什長三十人，正勇三百三十六人，伙勇四十二人，都五百人爲一營。營官四哨官不在此數。

凡十人爲隊，隊置什長一人，親兵分六隊，一隊劈山礮，二隊刀矛，三隊劈山礮，四隊刀矛，五隊小槍，六隊刀矛，每隊伙勇一人，六隊都七十二人。

凡一哨哨官一人哨長一人共護勇五人伙勇一人每哨八隊一隊擡槍二隊刀矛三隊小槍四隊刀矛五隊擡槍六隊刀矛七隊小槍八隊刀矛每隊什長一人伙勇一人其擡鎗隊正勇十二人合什長伙勇爲十四人其刀矛小鎗隊正勇十人合什長伙勇爲十二人每哨一百八人四哨兵都四百三十二人

凡營官若諸幫辦共用長夫四十八人運繩藥軍裝用長夫三十人親兵每劈刀礮隊用長夫三人每刀矛小槍隊用長夫二人六隊長夫都十四人哨官哨長及護勇五人

共長夫四人四哨共長夫十六人每擡槍隊用長夫三人每刀矛小槍隊用長夫二人四哨擡槍八隊長夫都二十四人刀矛小槍二十四隊長夫都四十八人計每營五百人用長夫都一百八十人每百人合用長夫三十六人許減不許增或拔隊遠行營官別撥公夫擡劈山礮不在此數。

凡營官薪水公費銀以月計不扣建哨官下逮長夫以日計俱扣建營官每月薪水銀五十兩辦公經費銀一百五十兩諸幫辦若司帳司軍裝書記醫匠薪糧若置旗幟號

補俱於公費內取之。哨官每人日給薪水銀三錢。哨長每人日給口糧銀二錢。什長一錢六分。親兵護勇俱一錢五分。正勇一錢四分。伙勇一錢一分。長夫一錢。每一營遇大建月支銀都二千八百九十二兩二錢。小建月支銀都二千八百二兩四錢六分。

凡統領自帶一營。薪水公費如營官制。其統至三千人以上者。每月加銀百兩。夫十人五千人以上者。加銀夫倍之。萬人以上者。三之。

凡新立營。自奉檄招募入選後。夫勇俱日給錢百文。謂之

小口糧至大營點驗成軍始給大口糧如前制其陣亡者
卹銀三十兩傷最重者十五兩次十兩次五兩成廢者另
加

凡營官幫辦書記軍火等共用夾帳棚八單帳棚二哨官
哨長護勇共用夾帳棚一單帳棚二四哨同親兵每隊夾
帳棚一單帳棚一六隊同正勇每隊單帳棚二三十二隊
同每一營用夾帳棚十八單帳棚八十都九十八架

凡募勇取技藝嫺熟年輕力壯樸實而有農氣者其有市
井衙門氣者不用募之日取保結造籍貫及父母兄弟妻

子名姓箕斗清冊以備清查

凡鍊兵五更三點卽起以三成隊站牆放醒礮聞鑼聲則散燈時如之放定更礮聞鑼聲則散黎明早操營官或幫辦閱親兵哨官閱本哨日斜時晚操如之午刻唱名營官幫辦點親兵哨官點本哨二更前如之每日夜共站牆二次看操二次點名二次其營官合全營點名看操月四五次無定期其守夜之規每夜一成隊站牆唱更每更一人輪換賊近則二成隊站牆每更二人輪換仍令哨長親兵常川稽查其傳暗令則不唱

凡紮營必擇頂上寬平旁面陡峻者

四面陡峻者難得或一面二面陡峻亦好

背山面水者

兵法右背山陵前左水澤亦難擇此好地但或前或左或右有一面阻水者即易禦敵

樵汲便宜者

汲道最關緊要如爲賊所斷則不可守

忌低窪忌平坦忌坐山

低客山高忌斜坡半而礮子易入營官先相地勢插竿牽

繩無事則長夫依繩築之敵近則兵勇併力焉牆高八尺

厚一丈草坯土塊砌其外中土宜堅每築尺餘橫鋪樹枝

防雨崩裂上有鎗眼內有子牆子牆高僅如牆之半環以

重濠外濠寬八尺深一丈有五上廣下狹內濠半之掘濠

之時每距二丈留一橫路重濠既成鋤其外路留其內路

餘土宜遠防雨灌之濠濠外花籬數層用木宜麤約長五尺餘埋土中二尺堅築旁土以防撼搖前後兩門前宜正大後宜隱僻營官帳棚向前門中留甬道親兵紮甬道旁四哨各居其方兩帳相距略寬以留水火之路外廁數處內廁兩處火藥埋地窖中上覆草棚塗之以泥留孔通氣以防潮溼大抵紮營之要有三牆子取其高而難登也濠溝取其深而難越也花籬取其難遠近前也曰壘曰壁曰土城皆牆子之類曰池曰陷馬坑

不甚寬長其上虛鋪以土

曰梅花坑

亂挖深坑約四五尺大小無定

皆濠溝之類曰木城

立木圓排周圍如城

曰柵

亦係立木

不必周
圍皆有

曰梅花椿

亂釘者曰梅花椿分層次者曰花籬笆

曰鹿角

樹之有杈枒者曰

扒馬椿曰檔木

中有橫木用小木斜穿以架於地

曰地刺

用竹削尖釘於地

曰鐵

蒺藜曰鐵菱角皆花籬之類三者缺一以營予敵矣距營

三箭牽繩爲牆貿遷在外不準越入門禁必嚴出入挂號

違者懲之夜發口號二字呼上應下謬則捕而誅之

凡拔營必擇習地勢諳賊情者率七八人先導常在大隊之前十里或二十里遇樹林村庄則搜之橋渡則誌之以防埋伏而制進退遇歧路則分人偵之若賊在前則以七成隊前行備戰鍋帳擔子走中間三成隊在後押之若賊

在後則以三成隊前行。鍋帳擔子隨之。七成隊殿後。或十營入營同行。各守其制。分班序進。不許攙雜混亂。每營派一弁押尾。輜重既過。稽查病卒落後。游勇假名。及本營不法者。

凡步隊日行三十里。長日或四十里。率八刻而行十五里。每軍所至。掘濠築牆。風雨寒暑。不改其常。濠牆未成。不許休息。亦不許搗戰。

凡禁令有七。曰洋煙。吸者禡之。鬻者驅之。曰賭。打牌押寶。犯者懲之。曰喧嘩。居勿吵嚷。臨敵勿高聲。有夢魘者。推而

警之曰姦淫和則棍責強則斬決曰謠言謗上離軍心者懲亂是非說短長者懲張賊勢妖言惑眾者斬曰結盟拜會鼓眾挾制者嚴懲拜哥老會習邪教者駢誅曰異服包巾衣褲及腰帶辨線禁用紅綠花鞋花巾並禁絕之

凡守城宜外有應援以通糧路尤宜鎮靜任賊往來不喊不放槍或二人守三垛或一人守二垛各守汛地此段有警彼段不許棄汛往救另設游兵一二支專司救應留一二門不砌以備游兵出擊

以上陸師

綠營水師承平時用艨艟巨舸繪以雲龍無事委舟江畔帆檣驟弛弗之間遇大操則新之軍士腰皮帶浮水面往來攢刺務爲美觀操畢復委之虛應故事而已道光中英夷犯順湖北始造銅甲船二巨容數萬斛上開礮孔周包以銅其形拙勢重無機器關振運掉不能靈每漢江風起怒濤喧騰簸搖掀撞旁船皆受其害敵至帆檣不能制其進退費帑億計而無裨於用見者嗤之洪楊初起無戰艦自粵浮湘間掠民舟載輜重及渡洞庭破武昌擄船滋益多江南水軍不能遏旣據金陵揚帆上駛往來楚皖江西

運糧濟師數日千里咸豐三年春向榮奏調廣東紅單船及閩廣快蟹大巴拖罟浮海至江南李德麟吳全美之徒號習水戰是時水師稱勁旅者推廣艇爲最江忠源初援湖北與曾國藩論江皖大局議造戰船數百先清江面及守南昌偵賊皆舟居乃囑郭松燾具稿請飭兩湖四川仿造廣東拖罟各數十

上可其奏下楚蜀行之於是曾國藩自長沙移駐衡州創立水師始編木爲簾寬七尺長丈有五剡其兩頭以衝敵試之不濟益專意造礮船而苦不知其制自運精思改商

舟爲之仿端午競渡船短橈長槳如蜥足鳥翼逆水鬪風不能阻然皆用己意締造無成法可循其制屢更未定會守備成名標白長沙來言廣東快蟹三板船式同知褚汝航自桂林來言長龍船式國藩令仿造之試礮果不震乃令成名標董其役褚汝航分廠湘潭奏留大營粵餉八萬辦水師凡成快蟹四十長龍四十三板八十四年春國藩東征有礮船二百四十募水師五千人分十營衡州六營以成名標諸殿元楊載福彭玉麐鄒漢章龍獻琛統之湘潭四營以褚汝航夏燮胡嘉坦胡作霖統之是爲湖南水

師之始其年四月岳州大風壞師船國藩奏徵知府李孟羣自廣西領水勇千人總兵陳輝龍自廣東領水勇四百至湖南國藩率以援鄂七月陳輝龍沙鎮邦褚汝航夏鏊諸殿元相繼戰歿而李孟羣楊載福彭玉麐屢戰洞庭湖自荆河達金口所嚮皆捷遂克武昌徇黃州諸屬邑下之水師聲威大振而彭楊名尤盛彭玉麐起諸生楊載福起外委國藩獨奇其才其後肅清長江二人功爲多玉麐屢擢皖撫漕督權兩江總督皆不拜改兵部侍郎尙書以巡長江不之官清望一時無兩載福易名岳斌由提督擢陝

甘總督自楊遇春以來武職

恩遇莫與爲比。然論水師戰績，載福尤爲當時之冠。云：初水師之興也，國藩博求避礮法，依古兵書，張魚網，溼絮牛皮，藤牌，礮來弗能禦，乃仿戚繼光剛柔牌，竹籬排外，承以牛皮，水絮人髮，次第編之，合而成牌，鉛丸至中穿之。楊載福笑曰：礮子可避乎？是有命焉。悉棄魚網，牛皮水絮不用。每戰，露立船頭，部卒効之，權舟徐進，鉛丸落艙中，其進自如。於是諸水師皆以避礮爲怯，盡撤屏蔽，乘礮而前，礮不能必中，舟師已偪壘，賊見之大恐，輒敗潰。故水師之強，由

彭楊倡之也。其後國藩攻九江。水師陷內湖。始於南昌。增造船礮。江西水軍興矣。五年春。武昌陷。胡林翼爲湖北巡撫。退屯金口。倚水師自保。設船廠於新隄。湖北水軍始盛。六年冬。林翼克武昌。進圍九江。是時湘軍礮船增至四百艘。而楊載福尤雄傑無倫。常越賊壘。孤軍深入。橫行千里。無阻。眾驚爲神。其後四年。國藩爲兩江總督。議建淮揚甯國太湖水師。林翼則欲立衢杭水師。皆不果行。而浙江已自立水軍。以湘軍將領之。自是東南七省。皆有礮船。其制皆仿湘軍。而賊亦時掠官軍戰艦。依式造之。然脆劣不任。

戰卒失長江之險。曾國荃之圍安慶。引江水灌濠。浮戰船。與陸軍犄角。已乃昇礮舟至菱湖。與賊拒。安慶既克。立淮揚水師。以黃翼升統之。同治元年三月。曾國荃進軍規金陵。彭玉麟統水師十八營助之。五月。國荃屯雨花臺。曾貞幹駐江東橋。以水師護糧道。其後李秀成、李侍賢率六十萬眾犯雨花臺。而糧運不匱者。水師之力也。是年更立太湖水師十營。以李朝斌統之。三年六月。金陵克。

朝廷論平寇功。以國藩創立舟師爲首。而國藩亦言長江旣清。賊糧漸匱。故金陵兩載而告克。明年。國藩北征。議立

黃河水師。其時劉長佑督直隸。初用民船載礮守河。已乃更置礮船。捻至輒卻之。而陳湜亦興山西水師。其後二年。李鴻章勦捻。益徵黃翼升等水師守運河。於是山東河南濱水之區。皆有礮船。國藩玉磨以長江五省戰事大定。師船千餘號。礮位二三千。利器不宜浪拋。勁旅不宜裁撤。奏請改經制水兵。

詔允之。設長江提督一人。綰五省兵事。以黃翼升爲之。旋命侍郎彭玉磨歲巡一次。翼升病免。李成謀代之。未幾起。前總督楊岳斌分巡長江。岳斌乞退。事專於玉磨。是時中

國輪船盛行福建巡撫劉銘傳請減長江水師之半移其費造小火輪

詔下兩江總督曾國荃兵部尙書彭玉慶議之國荃玉慶言長江歲費銀才數十萬減其半無裨輪船而於水師大損事遂寢

凡水師快蟹船一營官領之長龍船十三板船十諸哨官領之合二十一船爲一營快蟹槳工二十八人艚八人艚長一人頭篙一人舵一人礮手六人都四十五人長龍槳十六人艚四人頭篙一人舵一人礮手二人都二十四人

三板槳十人頭篙一人舵一人礮手二人都十四人此初
定營制也咸豐五六年間裁快蟹減長龍爲八增三板爲
二十二合三十船爲一營

凡水師營官月給薪水辦公銀二百兩哨官日給銀四錢
艙長一錢六分舵工一錢五分頭篙礮手俱一錢四分槳
工一錢二分

凡船礮長龍頭礮二洋庄八百斤至千斤邊礮四各重七
百斤梢礮一重七百斤

快蟹制同
後廢不用

三板頭礮一重七百斤

至八百斤梢礮一重六百斤至七百斤俱洋庄腰礮轉珠

二重四五十斤各船仍分配洋槍鳥槍刀矛備短戰

凡旗幟桅上用方長龍桅旗長一丈有二寬七尺三板桅旗長九尺寬六尺上半紅色下半白色畫北斗太極如意從其意梢用尖角長龍梢旗長一丈一尺寬九尺三板梢旗長九尺寬七尺書某標某營某哨其各標營哨或桅上添小旗或船頭設立旗寫姓號爲記顏色制度從其意

凡結營小船依洲大舟橫流相距欲疏以避暴風撞損風起則三板保於大舟接戰則三板爭先快蟹長龍以備指揮敗則棄之以三板歸百舟雖敗一舟可全全船傷死一

人可戰。故水師之強。一時無敵。

凡快船長龍中。裝窗櫓三板。露載無篷版。停泊則施夾帳。覆船行則去之。弁卒終歲舟居。不許登岸。軍士自造長龍。載輜重。號爲公船。

凡接戰。宜乘逆風逆流。勝則易歸。敗則易退。其次順流逆風。往來稍易。陳輝龍之敗。乘順風順流。故一敗不能返。

凡長江水師。制兵萬二千人。月費銀五萬有奇。自荊州岳州至崇明。以達於海。延袤千餘里。綰以長江。提督所部總兵四人。駐岳州漢陽湖口瓜洲。分二十四營。每營營官一

人以副將參將遊擊充之。每船哨官一人，以都司守備千總把總外委充之。計船七百七十四，哨官如其數。提督總兵坐船外，加督陣大三板二，其俸薪口糧及修補船礮經費，於長江酌留釐稅，其地連五省，故議五省分任餉事。湖南留岳州卡，湖北留漢口卡，江西留湖口卡，安徽留大通卡，江蘇留瓜洲卡，設船局於漢陽吳城，草鞋夾火藥局於安慶武昌，子彈局於長沙，都守以下坐船爲衙署，遇搶劫案，哨官爲專汛，營官爲本轄，俱予疏防處分，而統轄之提鎮不與焉。其水師員弁，大街借補小缺者，不准借至三級。

以下已補借缺者仍照本銜升轉不得照借缺再借他缺著爲令

凡長江水師長龍額設兵二十五人舵兵一人日給銀一錢二分艙兵頭兵各一人礮兵四人俱日給銀一錢槳兵十八人日給銀九分三板十四人如舊制督陣大三板二十人舵兵頭兵各一人礮兵二人槳兵十六人口糧如長龍之制稿書視舵兵書識視槳兵俱扣建

以上水師

我

朝龍興東土。騎射之精。罕有其倫。外綏番回。內靖寇盜。不
過精騎數千。卽奏膚功。然恬熙既久。八旗世胃。多溺貴寵。
習文弱。而吉林黑龍江。爲天下勁旅所在。鳴鏑馳馬。射獵
爲俗。其人類忠實勁質。勇於赴敵。如多隆阿舒保之倫。不
識漢字。操奇握勝。暗與古合。雖孫吳無以過之。曾國藩常
歎馬隊之妙。無美不備。而稍惜其擾民。欲增長夫助之。其
後征江南。募馬勇。初定馬軍營制。二十則四人爲棚。六棚
爲哨。十哨爲一營。哨官十人。正勇二百四十人。營官領之。
營官有幫辦字識各一人。親兵八人。俱有夫馬。先鋒官五

人爲棚夫馬如之復設步隊什長一人步隊親兵十人共一棚專備差遣及守營之用又公長夫四十人運軍械草料其後剿捻國藩乃改定前制焉茲錄其後者

凡馬軍一營營官一人幫辦一人字識一人分前後左右中五哨其前後左右四哨各立正哨官一人副哨官一人中哨卽以營官爲正哨外立副哨二人每哨馬勇五十人每棚什長一人一營什長都二十五人散勇二百二十五人營官及兩副哨幫辦字識共用伙夫二人四哨之正副哨官共用伙夫四人二十五棚每棚用伙夫一人通營伙

夫都三十一人

凡馬軍營官月給薪水馬乾銀五十兩公費銀一百兩馬
四匹幫辦月給銀十六兩馬一匹字識月給銀九兩馬一
匹正哨官月給銀十八兩副哨官月給銀十五兩各給馬
二匹俱不扣建什長日給銀二錢六分馬勇日給銀二錢
四分各給馬一匹伙夫日給銀一錢一分俱扣建

凡營官領藍夾棚二白單棚一正副哨官共領藍夾棚一
白單棚一幫辦字識領白單棚二馬勇每十人領白單棚

二

凡搬運鍋帳子藥每哨雇大車一輛由糧臺發價

如南方無車每

營仍用長夫四十人

如或置買大車駱駝亦由臺發價每營百馬之

內每年准報倒斃三十六匹如數換領以資彌補

凡獸醫鐵匠旗幟大小掃把鐵刮竹槽出自營官公費修補鞍上坐褥布屨後鞦轡頭肚帶及拴肚帶寬皮條拴鐙窄皮條哨官兵勇自辦更換鞍橋牛皮韁皮札鐵嚼全副馬槍弓箭扎草刀草料口袋軍械所辦給

以上馬軍

昔田單攻敵魯仲連策其不能下已而三月不下田單問

之仲連曰將軍之在卽墨坐則織黃立則仗鉞爲士卒倡
將軍有死之心士卒無生之氣聞君言莫不揮涕奮臂而
欲戰此所以破燕也當今將軍東有夜邑之奉西有淄上
之娛黃金橫帶而騁乎淄澠之間有生之樂無死之心所
以不勝也曾國藩服膺其言常引以誡將弁然湘軍起貧
苦忍飢赴敵喋血千里其初並無部撥之餉征調之兵徒
以將帥恩義相聯感發興起張皇補苴朝不保夕其徘徊
於江西躑躅於祁門亦可謂有死心無生氣者矣及其克
金陵清廣粵北靖捻回西定羌戎析爵儲圭將相接踵區

區夜邑淄上之奉不足數矣。則所謂有生之樂無死之心者。後來者可不引爲戒乎。吾故採曾公歌辭。所以勸誡軍士者。見當時經始之難。用心之苦焉。

保守平安歌

咸豐二年在湘鄉作

第一莫逃走

眾人謠言雖滿口。我境切莫亂逃走。我境僻處萬山中。四方大路皆不通。我走天下一大半。惟有此處好避亂。走盡九州并四海。惟有此處最自在。別處紛紛多擾動。此處卻是桃源洞。若嫌此地不安靜。別處更難逃性命。只怕你們

太膽小。一聞謠言便慌了。一人倉忙四山逃。一家大小泣
嗷嗷。男子縱然逃得脫。婦女難免受煎熬。壯丁縱然逃得
脫。老幼難免哭號咷。文契縱然帶著走。銀錢不能帶分毫。
衣服縱然帶著走。豬牛難帶一根毛。走出門來無屋住。躲
在山中北風號。夜無被鋪牀板凳。日無鍋飯切菜刀。受盡
辛苦破盡財。其實賊匪并未來。祇因謠言白驚慌。惹起土
匪吵一場。茶陵道州遭土匪。皆因驚慌先走徙。其餘各縣
逃走人。多因謠言嚇斷魂。我境大家要保全。切記不可聽
謠言。任憑謠言風浪起。我們穩坐釣魚船。一家安穩不喫

驚十家太平不躲兵。一人當事不害怕。百人心中有柄樞。本鄉本土總不離。立定主意不改移。地方公事齊心辦。大家喫碗安樂飯。

第二要齊心

我境本是安樂鄉。只要齊心不可當。一人不敵二人智。一家不及十家強。你家有事我助你。我家有事你來幫。若是人人來幫助。扶起籬笆便是牆。只怕私心各不同。你向西來我向東。富者但願自己好。貧者卻願大家窮。富者很心不憐貧。不肯周濟半毫分。貧者居心更難說。但願世界遭

搶劫各懷私心說長短彼此有事不相管縱然親戚與本家也是丟開不管他這等風俗實不好城隍土地都煩腦萬一鄰境土匪來不分好歹一筆掃富者錢米被人搶貧者飯碗也難保我們如今定主意大家齊心共同努力一家有事聞鑼聲家家向前作救兵你救我來我救你各種人情各還禮縱然平日有仇隙此時也要解開結縱時平日打官方此時也要和一場大家喫杯團圓酒都是親戚與朋友百家合成一條心千人合做一雙手貧家飢寒實可憐富家量力略周旋鄰境土匪不怕他惡龍難鬪地頭蛇

箇箇齊心約夥伴。關帝廟前立誓願。若有一人心不誠。舉頭三尺有神明。

第三操武藝

要保一方好土地。大家學些好武藝。武藝果然學得精。縱然有事不受驚。石頭要打二十丈。石灰罐子也一樣。木板只要五寸寬。箭箭要中靶子上。石頭灰罐破得陣。又靶鋪子一齊進。靶子也立一塊板。板上先鑿四箇眼。眼內安箇小木毬。戳在鋪子尖上留。只要枝枝戳得準。保守地方總安穩。火器雖然是箇寶。烏銃卻要鑄得好。火藥也要辦得

真不然炸裂反傷人。銃手若是不到家。不如操演不用他。惟有一種竹將軍。裝得火藥大半斤。三股麻繩緊緊纏。一礮響動半邊天。件件武藝皆無損。石頭錨子更要緊。石頭不花一文錢。錨子要出一道圈。若是兩箇習得久。打盡天下無敵手。讀書子弟莫驕奢。學習武藝也保家。耕田人家圖安靜。學習武藝也不差。匠人若能學武藝。出門也有防身計。商賈若能學武藝。店中大膽做生意。雇工若能學武藝。全又有聲名。又賺錢。白日無閒不能學。夜裏學習也快樂。臨到場上看大操。箇箇顯出手段高。各有義膽與忠肝。家

家戶戶保平安。

水師得勝歌

咸豐五年江西南康水營作

三軍聽我苦口說，教你水戰真祕訣。第一船上要潔淨，全仗神靈保性命。早晚燒香掃灰塵，敬奉江神與礮神。第二灣船要稀鬆，時時防火又防風。打仗也要去得稀，切莫擁擠喫大虧。第三軍器要整齊，船板莫沾半點泥。牛皮圈子挂槳樁，打溼水絮封藥箱。羣子包包要纏緊，大子箇箇要合膛。擡槍磨得乾乾淨，大礮洗得溜溜光。第四軍中要肅靜，大喊大叫須嚴禁。半夜驚營莫急躁，探聽賊情莫亂報。

切莫亂打鑼和鼓。亦莫亂放槍和礮。第五打仗不要慌。老
手心中有主張。新手放礮總不準。看來也是打得蠢。遠遠
放礮不進當。看來本事也平常。若是好漢打得進。越近賊
船越有勁。第六水師要演操。兼習長矛並短刀。盪漿要快
舵要穩。打礮總要習箇準。斜斜排箇一字陣。不慌不忙聽
號令。出隊走得一線穿。收隊排得一絡連。慢的切莫丟在
後。快的切莫走在前。第七不可搶賊贓。怕他來殺回馬槍。
又怕暗中藏火藥。未曾得財先受傷。第八水師莫上岸。止
許一人當買辦。其餘箇箇要守船。不可半步走河沿。平時

上岸打百板。臨陣上岸就要斬。八條句句值千金。你們牢
牢記在心。我待將官如兄弟。我待兵勇如子姪。你們隨我
也久長。人人曉得我心腸。願爾將官莫懈怠。願爾兵勇莫
學壞。未曾算去先算回。未曾算勝先算敗。各人努力各謹
慎。自然萬事都平順。仔細聽我得勝歌。升官發財笑呵呵。
陸軍得勝歌

咸豐六年在江西南昌省城作

三軍聽我苦口說。教你陸戰真秘訣。第一紮營要端詳。營
盤選箇好山岡。不要低窪潮溼地。不要一坦大平洋。後有
退步前有進。一半見面一半藏。看定地方插標記。插起竹

竿牽繩牆。繩子圍出三道圈。內圈略窄。外圈寬六尺。牆腳八尺濠。濠要築緊。牆要牢。正牆高要七尺。滿子牆只有一半高。爛泥碎石不堅固。雨後倒塌。一缸糟。一營只開兩道門。門外驅逐閒雜人。周圍挖些好茅廁。免得熱天臭氣薰。三里以外把箇卡。日日守卡。夜夜巡。第二打仗要細思。出隊要分三大支。中間一支且紮住。左右兩支先出去。另把一支打接應。再要一支埋伏定。隊伍排在山坡上。營營四處好瞭望。看他那邊是來路。看他那邊是去向。看他那路有伏兵。看他那路有強將。那處來的真賊頭。那邊做的假。

模樣件件看清件件說說得人人都膽壯他吶喊來我不喊他放鎗來我不放他若撲來我不動待他疲了再接仗起手要陰後要陽出隊要弱收隊強初交手時如老鼠越打越强如老虎打散賊匪四山逃追賊專從兩邊抄逢屋逢山搜埋伏隊伍切莫亂分毫第三行路要分班各營隊伍莫亂參四六隊伍走前後鍋帳擔子走中間不許爭先太擁擠不許落後太孤單選箇探馬向前探要選明白真好漢每日先走二十里一步一步仔細看遇著樹林探村莊遇著河水探橋梁遇著岔路探埋伏左邊右邊都要防

遇著賊匪來迎敵。飛馬回報不要忙。看定地勢并虛實。遲報一刻也不妨。前有探馬走前站。後有將官押尾幫。過了尾幫落後邊。插他耳箭打一千。第四規矩要肅靜。有禮有法有號令。哨官管兵莫太寬。營官也要嚴。哨官出營歸營要告假。朔日望日要請安。若有公事穿衣服。大家出來站箇班。營門擺設杖和枷。閒人進來便鎖拏。不許吸煙并賭博。不許高聲大喧譁。姦淫擄掠定要斬。巡更傳令都要查。起更各哨就安排。傳齊夫勇點名來。營官三夜點一次。哨官每夜點一回。任憑客到文書到。營門一閉總不開。衣服

裝扮要料峭莫穿紅綠惹人笑哨官不許穿長衣兵勇不
許穿軟料腳上草鞋緊緊穿身上腰帶緊緊纏頭上包巾
緊緊紮英雄樣子都齊全第五軍器要整齊各人製件好
東西雜木杆子溜溜圓又光又硬又發絲常常在手摸得
久越摸越熟越值錢鋪頭只要六寸長要出楊家梨花槍
大刀要輕腰刀重快如閃電白如霜槍礮鑽洗要乾淨鉛
子箇箇要合膛生漆皮桶盛火藥勤翻勤曬見太陽鋤鋤
鋤子要粗大斧頭要嵌三分鋼火毬都要親手製六分淨
硝四分磺旗幟三月換一次紅的印心白的鑲統領八面

營官四隊長一面哨官雙樹樹搖出如龍虎對對走出如
鴛鴦第八兵勇要演操清清靜靜莫號嘈早習大刀並鎗
子晚習跳牆並跳濠濠溝要跳八尺寬牆子要扒七尺高
樹箇靶子十丈遠火毬石子手中拋閒時尋箇寬地方又
演跑隊又演鎗鳥鎗手勁習箇穩擡鎗眼力習箇準灌起
鉛子學打靶翻山過水習跑馬事事操習事事精百戰百
勝有名聲者箇六條句句好人人唱熟是祕寶兵勇甘苦
我盡知生怕你們起了虧仔細唱我得勝歌保你福多又
壽多

淮軍記

卷二十

三

愛民歌

咸豐八年在江西建昌大營作

三軍箇箇仔細聽。行軍先要愛百姓。賊匪害了百姓們。全靠官兵來救人。百姓被賊喫了苦。全靠官兵來作主。第一紮營不要嬾。莫走人家取門板。莫拆民房搬瓢石。莫踹禾苗壞田產。莫打民間鴨和雞。莫借民間鍋和碗。莫派民夫來挖濠。莫到民家去打館。築牆莫攔街前路。砍柴莫砍墳上樹。挑水莫挑有魚塘。凡事都要讓一步。第二行路要端詳。夜夜總要支帳房。莫進城市占鋪店。莫向鄉間借村莊。人有小事莫喧嘩。人不躲路莫擠他。無錢莫扯道邊菜。無

錢莫喫便宜茶更有一句緊要書切莫擄人當長夫一人
被擄挑擔去一家唬哭不安居娘哭子來服也腫妻哭夫
來淚也枯從中地保又誘錢分派各國并各都有夫派夫
無派錢牽了騾馬又牽豬雞飛狗走都嚇倒塘裏嚇死幾
條魚第三號令要嚴明兵勇不許亂出營走出營來就學
壞總是百姓來受害或走大家誘錢文或走小家調婦人
這些地痞做夥計買些燒酒同喝醉逢著百姓就要打遇
著店家就發氣可憐百姓打出血喫了大虧不敢說生怕
老將不自在還要出錢去陪罪要得百姓稍安靜先要兵

勇聽號令陸軍不許亂出營水軍不許岸上行在家皆是
做良民出來當兵也是人官兵賊匪本不同官兵是人賊
是禽官兵不搶賊匪搶官兵不淫賊匪淫若是官兵也淫
搶便同賊匪一條心官兵與賊不分明到處傳出醜聲名
百姓聽得就心酸上司聽得皺眉尖上司不肯發糧餉百
姓不肯賣米鹽愛民之軍處處喜擾民之軍處處嫌我的
軍士跟我早多年在外名聲好如今百姓更窮困願我軍
士聽教訓軍士與民如一家千計不可欺負他日日熟唱
愛民歌天和地和又人和

解散歌

咸豐十一年安徽祁門大營作

莫打鼓來莫打鑼聽我唱箇解散歌如今賊多有緣故大半都是擄進去擄了良民當長毛箇箇心中都想逃官兵若殺脅從人可憐冤枉無處伸良民一朝被賊擄喫盡千辛并萬苦初擄進去就挑擔板子打得皮肉爛又要煮飯又搬柴上無衣服下無鞋看看頭髮一寸長就要逼他上戰場初上戰場眼哭腫又羞又憾又懵懂向前又怕官兵砍退後又怕長毛斬一年兩載髮更長從此不敢回家鄉一封家信無處寄背地落淚想爺娘被擄太久家太貧兒

子餓死妻嫁人半夜偷逃想回家層層賊卡有盤查又怕
官軍盤得緊跪求饒命也不準又怕團勇來訛錢搶去衣
服并盤纏種種苦情說不完說起閻王也心酸我今到處
貼告示凡是脅從皆免死第一不殺老和少登時釋放給
護照第二不殺老長髮一尺二尺皆遣發第三不殺面刺
字勸他用藥洗幾次第四不殺打過仗丟了軍器便釋放
第五不殺做偽官被脅受職也可寬第六不殺舊官兵被
賊圍捉也原情第七不殺賊探子也有恩民被驅使第八
不殺緝送人也防鄉團緝難民人人不殺都贈卹各各逃

生尋去向賊要聚來我要散賊要擄來我要放每人給張
免死牌保你干安又萬當往年在家犯過罪從今再不算
前帳不許縣官問陳案不許仇人告舊狀一家骨肉再團
團九重

皇恩真浩蕩一言普告州和縣再告兵勇與團練若遇有
從難民歸莫搶銀錢莫剝衣

王定安曰古云有治人無治法法者所以濟一時之窮未
有歷百年而不變者也湘軍初興王鑫羅澤南皆講步伐
諸戰陳深溝固壘與賊相拒曾文正採其說而立營制

湘軍

規制多採之王
金練勇芻言

楚師之強莫與京矣及鄒捻中原賊騎猷

急官軍固無築壘挖濠之暇卽以馬逐馬勢常失之不及
乃棄鍋帳裹餼糧晝則徒跣夜則野宿烏用所謂濠壘者
乎其後陝甘討回之師貴州平苗之役皆以野戰鵬翔取
勝濠壘堅脆無關軍事之得失是豈可以常情論哉至水
師之設厯今垂四十年盜賊畏其威商民懷其德固一時
盛軌矣然而兵輪鐵甲日新月異中國智勇之士方且師
夷智造戰輪與外族爭雄海上夫船礮固若士之筆墨然
微墨湖筆天下之至良也必得善楷法者書之楷法工矣

而其詩失黏文背題仍不能取勝場闌也是故楮精墨良
不如文章船堅礮利不如猛士機輪百巧擱於頑島鐵甲
堅質敗於焦石善乎曾公之論水師也曰兵隨地形賊勢
而變豈有可泥之法不弊之制惟夫忠臣謀國百折不同
勇士赴敵視死如歸斯則常勝之理萬古不變耳願以告
世之究心兵事者

湘軍記卷二十一終

武昌范德培校字